

碑版文廣例卷九

長洲王芑

孫念豐輯



唐

誌載生平箸撰例

開元中陳憲墓誌云嘗著中道通教二論注周易撰
三傳通誌廿卷集內經藥類四卷合新舊本卅十卷
並行於代此爲後人碑誌臚載其人箸撰之所始

標題書姓不書名例

開元十二年號國公楊華臺銘并敘判官亳州臨渙
縣尉申屠液撰而無書人姓名一石刻敘一石刻銘
碑版廣例 卷九 一
實一物而兩石高廣豐殺微有不同殆兩層礎之華
臺故下豐上殺爾號國公楊者內侍楊思勗也思勗
以開元十二年平覃行章進輔國將軍封號國公華
臺卽其時造也此爲後世尊官書姓不名之例

貶官後仍繫故階例

李北海以開元十三年謁上泰山獻詞賦爲張說所
忌貶遵化尉而十八年書麓山寺碑十九年書東林
寺碑記仍自署前陳州刺史江夏李邕文并書繫銜
不及遵化尉蓋當時貶秩者猶不至如東坡謫官後
自署黃州團練副使不得簽書公事云云也

游覽題名括例

游覽題名自東漢有之然故不多而殘剝亦甚北宋以後文句可觀者在今又多而不勝舉也乃就唐世題名之完善者類而括之亦足以知其體例矣

華嶽頌碑題名

鄭縣尉李憺以開廿四六月六日充敕簡募飛騎使判官向陝虢州點覆其月十四日事了回便充京畿采訪使向覆判官此過赴京

碑版廣例

卷九

二

案此刻於華嶽頌之左側開下脫元字唐人書年雖不必定有年字如李陽冰文大厯惟二昌黎文貞元廿九之類義自可通然特為祭文韻語句斷自有定數而然若此題名似所不必或亦脫字耳

案此亦題頌碑左側

皇唐乾元元年歲次戊戌冬十月戊申真卿自蒲州刺史蒙恩除饒州刺史十有二日辛亥次於華陰與監察御史王廷昌大理評事攝監察御史穆嚳評事張澹華陰令劉暉主簿鄭鎮同謁金天王之神祠顏真卿題記

案此刻頌碑之右旁金石文字記曰魯公每游山必刻已姓名一置高山之巔一投深谷之內曰焉知異日不有陵谷之變古人重名所以重其身今人不重其身因不重名耳

述聖記碑題名

大唐中興剋復兩京後乾元元年自十月不雨至
於明年春朝散大夫使持節華州諸軍事檢校華
州刺史平原郡開國公賜紫金魚袋張惟一與華
陰縣令劉暉丞缺峒丞員外置同正員李緩主簿
鄭鎮尉王禁尉高佩尉崔季陽於西嶽金天王廟
祈請初發言雲興條登車雨降蓋精意所感致暵
神應期庶似頽之能不慚方伯之事時二月十日
題紀前金州刺史李權書

案此題述聖
記之左側

碑版廣例

卷九

三

大唐上元元年冬十有二月十一日同詣嶽祠書

記

案此作篆體
書在上

華陰縣令王宥前令王紓丞王沐尉李齊佺尉缺

頌鄭縣主簿張彬尉竇或下邳縣丞李演尉邢涉

處士王季友張彪著作郎孟昌原京兆府法曹參

軍李樞書并篆

案此作隸書分兩截書
之在述聖記碑之右

邱據題名

陳鄭澤潞等州節度行軍司馬殿中侍御史邱據

再隨使主赴上都朝謁來往皆虔拜神祠時寶應二年六月八日記

大梁趙令衿恭謁聖帝祠下

焦緩題名

前大理司直焦緩與緱氏縣焦琳華州司倉參軍

焦賁永泰元年春同游此廟

第五公等題名

前相國京兆第五公自戶部侍郎出牧栝州子聿

關內河東副元帥判官禮部郎中兼侍御史虞當

自中都濟河於華陰拜見從謁靈祠因紀貞石時

碑版廣例

卷九

四

大唐大曆五年六月四日司勳郎中兼侍御史李

國清倉部員外兼侍御史張曇大理正兼監察御

史王翺右衛錄事參軍第五準

案此亦題華嶽頌碑右側時第五公坐與魚朝恩善出貶子壻之稱初見於此壻作聿者千祿字書云聿聿壻上俗中通下正壻一變為壻再變為壻三變為聿四變為聿皆由音變為音致誤又聿或亦作聿故月耳相瀾又女夫之稱初見於乾封二年張開疆尹氏女造像記

蘇敦等題名

沃州司馬蘇敦

弟華陰縣令發

弟咸陽縣主簿敦

弟前華原縣丞徹

弟太常寺主簿敞

弟吏部常選暉

弟少府監主簿教

弟灑 時年十一

大歷中發任華陰縣令時禮部尚書河東裴公出牧鄆陽敦與發徹同送至此拜謁金天便過東驛不避炎暑亭午而回故列名於前刻石題記五年

夏六月六日

崔微等題名

碑版廣例

卷九

五

前開州刺史崔微男蕤

前緱氏縣令康洽

前鄉貢進士侯季文

大歷七年三月廿日西去上

上官沼題名

侍御史上官沼大歷十三年七月廿九日赴東臺

謁嶽過

崔漢衡題名

蓮華巍巍竹箭喧豗浩浩今古潼潼往來

銀青光祿大夫守兵部尚書博陵郡開國公崔漢

衡興元元年十二月廿三日華陰縣令盧傲書

案古人往往有借舊碑題韻語數言此類是也

岱嶽觀題名

淄州刺史王圓山人王缺字大厯十四年二月廿

一日同登泰嶽時真君道士卜皓然萬歲道士郭

紫微各攜茶菓相候於回馬嶺因憩於王母池登

臨之興無所不至驅使官樂瓌題記

檢校尚書駕部郎中使持節都督兗州諸軍事兼

兗州刺史侍御史充太州團練使任要貞元十四

年正月十一日立春祭嶽遂登太平頂宿其年十

碑版廣例

卷九

六

二月廿二日立春再來致祭茶宴於茲同游詩客

韋洪押衙王遷運乾封縣令王怱尉邵程嶽令元

寘造車十將程日昇後到續題

案金石文字記茶芽之茶與茶苦之茶本一字古

時未分麻韻茶芽字亦只讀為徒東漢以後乃音

宅加反而加字音居何反猶在歌戈韻梁以下始

有今音又去一畫為茶字此碑兩見茶字可見唐

時字體未變爾雅檟苦茶廣韻九麻

中又案泰山東南麓唐岱嶽觀土人稱為老君堂有

二碑高八尺上施石蓋合而束之其字每面作數

層刻之自顯慶以速大厯建中六帝一后敕使遣

祭修齋建醮凡二十許事異乎後世之每歲一碑

者也碑中題名有專檢校官祇承官專當官專當

齋并檢校像官都檢校官專管官專知官同檢校

官同勾當官小使隨使品官諸標目今

錄其二餘可概見品官二字亦此初見

小字書表疏大字書詔旨例

明皇石臺孝經四面刻之其額篆書太子亨奉敕所題御製敘并注及書皆隸字前三面皆經注末一面之後半分上下兩截上截載李齊古所上表文小字正書下截載明皇批答大字行書後世刻取旨事件於批答處有作大字書之者例出於此

一時自有沿用異文例

一代各有沿用異文習焉不察如漢碑惟今之類唐人自韓柳未出以前雖窮力追新終有千篇一律處如誌墓者必言葬於某鄉之原禮也自是當時襲用碑版廣例

卷九

七

常語而更有以之原二字倒爲原之者天寶六載義興周夫人誌云以茲吉晨赴杜城東郊原之禮也餘姚盧氏抱經堂集跋以爲初疑句有脫字及觀大厯中光祿卿王訓墓誌方知當時自有此文法以余攷之又不止王訓墓誌爲然今姑列舉之以見一時沿用異文然用此者亦僅當時俗子了非名輩若燕許大手以暨文人學士固未涉筆豈待韓柳而後能去之哉

王訓墓誌

遷厝萬年縣涇川鄉涇川原之禮也

真化寺尼如願墓誌

七月十八日奉敕法葬於長安城南單原塔之禮也

故雁門郡解府君墓誌

以元和五年十一月權厝於私第北二里原之禮也

故京兆府美原縣張府君墓誌

歲次景子十月三日窆葬於京城南

杜城東二百步舊塋之禮也

周淮南公杜君墓誌

以隋開皇元年十月一日與夫人馮氏合葬於龍山原里

之禮也

雲麾將軍張安生墓誌

天寶十三載冬十一月十日扈從薨於昭應縣之官

第又以翌載春二月十三日別兆葬於龍首原之禮也

內常侍孫志廉墓誌

合葬我府君夫人於長樂原之禮也

作古無今有之神祠碑例

鹽池神城隍神祠廟古之所無今之所有而其本皆

碑版廣例

卷九

八

起於唐日新月異不能不變古初作如近世秀水朱

檢討財神廟碑變而得其正乃不失文家體製誠欲

參酌其義例則於唐賢諸碑不可忽也故略錄其大

云案權鹽之制始於唐代宗大厯中涇兩壞鹽池韓

混判度支慮減常賦妄言池生瑞鹽代宗命蔣鎮馳

驛案視鎮內欲結混故實其言奏置祠房池有賜號

元和中皇甫鎛奏置稅鹽院同江淮兩池權利貞元

中裴延齡以河中為會府延齡卒蘇弁繼之今河東

鹽池靈慶公神祠碑即其事也碑兩面其陽刻崔敖

之頌其陰刻劉宇之記其事出於韓混蔣鎮後先欺

飾裴延齡蘇弁又皆固利小人爲不足書而其文博
瞻詳雅勑古所無可爲後式亦不以人廢言之義也

大唐河東鹽池靈慶公神祠碑

并敘

將仕郎太常博士崔教撰

將仕郎前試大理評事韋縱書并篆額

地絡之紀莫宗於河陰潛之功光啓於滙既略太
華浸淫中條嶽瀆宣精融爲巨浸肇有元命元圭
告成惟其潤下乃生爲鹵鹽池之數有九七在幽
朔二陂河東皇穹陰隲兆久眷祐中土因飲食以
致其味節和齊以調其心溟溟天池實曰鹽澤幅

碑版廣例

卷九

九

員百里澄澈萬頃元極積數太鹹爲嵯其墟實沈
其宿畢晷其漕砥柱其關巔軫后祇寶之設以重
險謙順成量澗谿攸鐘涵風蓄雷終古不息漫若
山外連爲海門所以帝乙建社而臨之王豹遷都
而據之執其重輕以曜富有在昔山澤委於虞衡
周制無征漢方盡幹務其尊嚮蓋用抑裔少府所
欽均其權量羣族自占築廬環之業傳祖考田有

上下旱理其卑水營其高五夫爲塋塋有渠十夫
爲溝溝有路臬之爲畦曬之爲門漬以渾流灌以
殊源陰陽相蒸清濁相孕動物潛象蠢爲陶工溜

乎而凝莫見其朕雪野霜地積如連山羨漫區域
歸於塗潦泉貨之廣沒於齊人皇家不賦百三十
載因宗御國五十年姦生薊邱燿火通鎬嗣聖受
命以兵靜之擊鼓靖洛封厥燕趙卻獫狁於絕漠
禿昆夷於窮荒亶其宸威風動八極調發之費仰
於有司雖田征益加而軍食不足遂收鹽鐵之算
置權酤之官以權合經以貨聚衆畫野標禁漸川
爲壕西籠解梁左緯安邑乃滌場圃乃完倉倉畢
其陽功以謹秋備度土定食止於中州濟於潢汾
爰距隴坂東下京鄭而抵於窳艘連其檣輦擊其

碑版廣例

卷九

十

轂終歲所入二百千萬供塞垣盡敵之賞減天下
大半之租然後傳於向人納於醢人有形有散以
宴以祀每仲夏初吉爲墀而饗之懿夫明徵厥有
前誌中宗反政崇朝而復鹹大缺窮霖巨漲而不
澹誠宜命秩視彼封君先皇帝薦靈慶以號神索
氤氲而建廟挖諸侯之法服鏘泮縣之清樂籍二
郡之版六百缺於司池故得浮榮光結顯氣冲其
德正其味粒重英以表稔華四出而呈瑞陳陳相
因非缺載可能計矣貞元九年冬天子親祀明堂
大裘而郊孝道升聞百蠻頓首粟帛之賚及於鰥

惇庶政惟和達於遐邇戶部尚書裴公延齡奠三壤之差缺九州之賦鐵鼓之貢林鹽之饒兀晉人

是輸以河中爲會府遂表職方郎中兼侍御史馮公缺推其全材委以大計詔曰兪興往哉汝諧乃

駐車蒲城以馭羣吏分命前永樂縣丞張巨源前鄭縣丞蕭曾率屬而臨之洎十一年秋九月裴公

蕝今戶部侍郎蘇公弁繼之以馮公成績有聞禮任如舊度支又以前詹事府司直陸位知解縣池

前大理評事韋縱知安邑池惟職方領地官之外權惟評直守制使之成算姦氣不作阜財有經十

碑版廣例

卷九

十一

三年四月五日兩池官吏及畦戶等請勒豐碑揚茲利澤感和羹之訓心游傅氏之巖稽近監之辭氣對郇瑕之邑微臣作頌式贊新宮頌曰

浩浩靈池冠於水行蒼茫太陰滲漉純精惟澤在缺與時爲程禍貪而竭福儉而盈巨唐君臨坤順

乾貞冥勤其官坎德效靈海眼通波河源伏脈千里一氣瀦爲廣屏雲漢昭靈玉繩下直曰雨曰風

以凝以積自我天產惟其口食斯皇元后乃聖乃神既絜浮沉亦修酬禋大禮畢舉大樂畢陳馮公

員來克諧神人登牲廟壻瘞幣池瀕既醉既飽馮

公則欣蕭張行優陸韋德鄰有缺有屬伊馮之賓
仰彼缺造垂於無垠皇運天長頌聲日新

貞元十三年歲次丁丑八月甲寅廿日癸酉建

靈慶公神堂碑陰記

五老山人劉宇撰并書

天作缺極神將宅焉神者何靈化之真宰者也夫

神之倣落寞曰監宗閭閻禱之不在祀典元皇朝
有元老韓公滉之惣邦賦以大醜之功康濟是博
上以供宗廟之費下以代田野之租升聞於天請
加禮秩帝曰可於是冊爲靈慶公俎豆之數視於

碑版廣例

卷九

七

淮濟享謁之期載在天府及故東都留守禮部尚
書崔公縱頃知河中院以神之舊宮僻在幽居旣
崇其禮宜敞厥居是用遷置於斯乃飭殿堂開像
設面龔淪之積水跨躡迤之重崗陰陰森森容衛
畢備列卒禿壁儼然如生雖水府靈居未之若也
今職方郎中兼侍御史馮公興纂其是職推致信
讓無小無大報之以德頃以天人不同草木無輝
農夫愁怨慮失其歲職方於是齋心累辰親執牲
帛將至誠之德告靈化之源嘗不崇朝而雨斯足
如是者數四是則人有德於神神亦有德於人德

交歸焉政是用長宜其建石表異徵文紀靈是以
有太常博士崔君之頌也逮夫石自他山而至文
自奉常而來知解縣池詹事府司直陸位事以道
自集商以仁自來知安邑池大理評事韋縱財以
清自豐吏以剛自肅此二君者以爲職方之精意
可達於明神如之何不奉矣乃相與就其磨礱覆
以棟宇自朔及望揭焉而舉洪範曰潤下作鹹夫
敘贊靈慶公陰潛之功亦所以表聖身澤及於萬
姓者也恐其頌或有缺乃命山客重紀於碑陰

貞元十三年七月二日記

碑版廣例

卷九

十三

緡雲縣城隍廟記

城隍神祀典無之吳越有之風俗水旱疾疫必禱
焉有唐乾元二年秋七月不雨八月旣望緡雲縣
令李陽冰躬禱於神與神約曰五日不雨將焚其
廟及期大雨合境告足具官與耆耄羣吏人自西
谷遷廟於山巔以答神休

案五代梁初吳越錢鏐於鎮東軍奏建牆隍廟請
以唐故右衛將軍總管龐玉爲牆隍神封崇福侯
撰文并敕勒石廟中要此與羅池碑以神鬼實之
之一例也又城隍神不見於古易城復於隍左傳
祝宗用馬於四廟又云祈於四廟杜預注廟城也
此始城隍神所肇端北史慕容儼隋書五行志記
梁武陵王紀祭城隍文杜甫有賽城隍之向其祀至
唐張說有祭城隍文

唐始盛然尚不列於祀典宋歐陽公時天下通祀
而縣城亦未盡有元史天曆二年封爲護國保嬰
王剛洪武初從禮臣請加以封爵京師曰昇福明
靈王府曰威靈公州曰靈祐侯縣曰顯祐伯未幾
又去封爵祇曰城隍之神而城隍遂爲祀典今天
下神祠日多創古所無又無論天神地祇一皆以
人鬼實之此又古今祀典之變例也又案蜀李調
元新按神之祀城隍廟祀始見昌黎文始爲蜡注伊
神祀始於吳赤崑一年記曰伊耆氏始爲蜡注伊
耆氏堯也蜡祭八神水庸居七水則隍也庸則城
也此正城隍之始左傳四鄙
皆其證也庸鄙古字通用耳

書封贈官階例

前此追贈皆以其人自有勲勞歿而褒恤未有以子
孫獲贈見書者至唐中葉此例始多趙叡冲碑敘元
宗朝以嗣子參掌給誥追贈公虢州刺史夫人平陽

碑版廣例

卷九

古

郡太夫人肅宗朝以次子節制方面累公太常卿其
標題曰唐故同州河西縣丞贈虢州刺史太常卿天
水趙公神道碑縣丞是其本官乃先書本官後及贈
職也臧懷恪碑懷恪終於右武衛將軍上蔡縣開國
侯碑敘其七子官勲甚詳末因其季子希讓獲贈又
詳敘其乾元三年寶應元年贈魏州刺史贈太常卿
并全載廣德元年贈工部尚書詔辭明著其位以德
遷父由子貴之文其標題則曰唐故右武衛將軍贈
工部尚書上柱國上蔡縣開國侯臧公神道碑銘武
衛將軍是其本官上蔡縣侯是其本封亦是先書本

官後及贈職末著勳封也段行琛碑敘其鄉賦甲科而不著官位碑首先書府君之子四鎮北庭涇原節度使開府儀同三司御史大夫張掖郡王秀實追琢貞石光昭先考下書廣德二年大曆十年十三年三次追贈府君至楊州大都督夫人至忻國太夫人其標題曰大唐贈揚州大都督段府君神道碑銘是專書贈職不書本官蓋以本官為不足書也

碑誌著所憑行狀例

魯公撰廣平宋文貞碑敘夫人崔氏合葬詳敘七子官闕與臧懷恪碑同惟此碑為其孫儼所追立故亦以著於篇而末又著之曰謹憑吏部員外郎盧僎所上行狀略陳萬一為後來碑版書所據行狀例所自始

碑版廣例

卷九

五

蔡古碑側雖多刻字然有碑陰記之名無碑側記之說有之亦自是碑始碑則記魯公撰碑作於大歷七年記作於十三年記補敘前碑所漏略廣平逸事兼記出資市石之人并附錄子孫忠績以見遺德雖皆漢碑餘例然自韓柳以後芟削日就簡嚴文律益精文體益貴而朴質之氣亦日就簡魯公雖詞繁不殺而質塞處亦自有不可及者

婦人亦得稱君例

魯公作其姑殷君夫人碑額書錢唐丞殷君夫人顏君之碑題書有唐故杭州錢唐縣丞殷府君夫人碑

其款自署第十三姪男婦人稱君及撰人稱姪男皆此初見其敘夫人號某而不書諱敘世系曰黃門侍郎之推府君之園皇朝秦王記室思魯府君之曾贈華州刺史昭甫府君之季女書府君而又皆直書其諱所敘內弟姨弟族弟皆自夫人稱之於殷君事行與殷氏世系一不及焉殆殷君先葬別有碑誌此專爲夫人作耳敘六女所適某某既列其名爵又著其才能表其所撰造皆例之變者稱曾稱園皆漢例其零星錯雜內弟姨弟亦碩人詩舉邢譚之義蓋古之婦德無非無儀稱其美者惟在族望卽穠李河廣諸碑版廣例

卷九

十六

詩可見故昌黎亦往往如是

案碑敘夫人終於某尉之公館公館二字亦此初見

碑用他人填諱書名例

亭林顧氏議今人行狀用他人填諱爲非然此例自唐有之大厯九年朝陽巖銘後有零邑後學田山玉書名一行貞元十五年徐浩碑張式撰浩次子峴書并篆額皆列名文前碑尾建碑年月之後刻字姓名之前有表姪前河南府參軍張平叔題諱一行是題諱書名之所從初也錢少詹事舉周益公跋初察王左丞贈曾祖詩題通直郎田橡題諱是爲宋人填諱

之例又麻衣子神字銘有南陽貢士李珩填諱其碑
字述魯翀撰二男字述魯遠書是爲元人填諱之例
亾友偃師武虛谷論此以爲父已歿矣而倩人題諱
君子之於名慎其終如此不可謂非也

雙名單舉一字例

東漢無二名而有複姓後人稱諸葛亮爲葛亮稱潘
安仁爲潘安或去其姓中一字或去其字中一字所
從來久矣其碑版中自署處雙名單舉一字則自柳
宗直等華嚴巖題名始華嚴巖題名前列永州刺史
馮敘永州員外司馬柳宗元進士柳宗直等平列書
碑版廣例 卷九
之其後一行書元和元年三月八日直題此雙名單
舉一字所由來也

書子婦例

書子婦非獨漢有之唐亦有之解府君誌書霜妻并
書長新婦文辭簡質第敘族姓名字鄉貫先世卒葬
歲月葬地妻子此外不加贊頌與漢孔彪晉劉韜相
似不失古義足矯後人諛墓過當之習故錄之

大唐故雁門郡解府君墓誌 并敘

府君諱進字進族茂雁門派別條分今籍於京兆
府鄠縣八步鄉解村人也祖諱齊而樂道不仕府

君卽樂道之第二子也修短不意去元和四年三月四日疾終於河南府河陽縣太平鄉樹樓村之私第春秋六十有五卽以元和五年十一月十一日權厝於私第北二里原之禮也霜妻李氏偕老願違哀號痛切嗣子忠信次子少遷次子少恭次子少璘次子少儀次阿小長新婦曹氏等號天叩地柴毀過禮始不勝喪窀穸云具禮物咸備恐墮隴有變故刻頌立石以作永年之記

歸
茫茫萬里寂寂松扉痛君子之長逝沒寒泉而不

碑版廣例

卷九

六

案孟縣志是碑在三十年前出土今置縣學文內非祖字爲父字之誤卽而字爲父字之誤當由書碑時失檢

唐人合葬原有夫婦雙標例

墓銘舉例謂婦人從夫合葬不書某氏黎洲黃氏堯峰汪氏皆主其說二十年前與彭允初論此允初云此等無關大義卽從俗書暨元配云云亦不問有例無例可也然唐人實已有例永貞元年有雲麾將軍河南府押衙張府君夫人上黨樊氏墓誌銘垂拱四年有澤王府主簿梁府君并夫人唐氏墓誌銘大中年有滎陽鄭府君博陵崔氏合祔墓誌銘會昌十二年有滎陽鄭府君博陵崔氏合祔墓誌銘會昌

四年有故尹府君朱氏夫人墓誌銘開成六年有貝州永濟縣故馬公郝氏二夫人墓誌銘其標題皆夫婦雙書故徐氏讀禮通攷亦以止仲之言爲非是今略舉其大凡云

唐故雲麾將軍河南府押衙張府君夫人上黨樊氏墓誌銘 并敘

公諱詵隴右天水人也曾祖園植皇朝盧龍府折衝祖定遠甘州司馬父崇正潭州長沙縣尉公卽長沙之_四子也幼而貞敏長而嚴毅立職清貫皆箸能縮兵權於湖南總劇務於河府 以貞元十

碑版廣例

卷九

九

年八月廿日終於洛陽永泰里之私第春秋六十九夫人樊氏曹州南華縣丞彥府君之息女蘊德柔剛言行端淑 所天先逝撫訓孤幼 以貞元

廿年四月十日終於家第享年五十有子三人長曰叔重次曰叔威皆幼而敏惠年未弱冠相次夭 亾季子叔齊 惟家之艱克紹先烈有女五人長女出家嚳刹寺大德法號義性戒律貞剛操行高

潔弟妹幼稚主家而嚴二女適京兆杜氏及禮而亾三女適天水趙詡四女適安定梁祕五女在室而嬪今孤子孤女等哀號失容 以永貞元年十

月廿日合而窆之雙棺同穴葬於平樂鄉

唐故滎陽鄭府君夫人博陵崔氏合祔墓誌銘

并

給事郎試太常寺奉禮郎攝衛州司法參軍秦

貫撰

鄭之先白周王封舅之地因而氏焉別派五流深
源一至是以滎陽之望得爲首冠其下公侯接武
台衡結迹彫軒繡軸之榮羽蓋朱轡之盛由魯史
記迄於唐春秋實鄭氏爲衣冠之衆藪也高祖世
斌皇左司郎中礪隰二州刺史新鄭縣開國男食

碑版廣例

卷九

二十

邑三百戶曾祖因嘉皇新都長水縣令襲封新鄭

縣開國男祖有常皇吏部常選襲爵新鄭縣開國

男烈考探賢皇衛州昌樂朝城莘縣令府君諱遇

字缺

二

皇試太常寺協律郎文業著於當時禮義

飾於儒行少有個儻之志長膺瓌奇之名不苟譽

以求容每親仁以竭憂爲中外模範爲友朋宗師

樂善孜孜不愠知鮮量苞江濟氣合風雲今之古

人人雖上出神不優德配壽胡差先夫人之亾蓋

世一霜也享年六十夫人博陵崔氏令門清族慶

餘承善四德兼佩六親雖和仁讓得於天真慈惠

立於素尚母儀內則動靜可師禮行詩風進止成
法雖婕妤女史大家經教承之於諷習推之於行
源者亦異代殊人其歸一也未亾之歎孀齡杳然
玉沒何先蘭凋遽至以大中九年正月十七日病
終於淇隩之私第享年七十有六以大中十二年
二月廿七日合祔於先塋之側其鄉里原隰之號
載於舊記此缺而不書女一人適范陽盧損之嗣
子六人長曰頊攝汲縣丞知縣事蚤亾次曰珮蚤
亾次曰瑾次曰玘次曰璩次曰琬咸繼以遺芳克
修至行銜哀茹毒追攀罔極將營護缺空泣告於
業文者爲之銘云

碑版廣例

卷九

廿

仕門雙美兮令德咸芳甲族齊茂兮英華克彰允
文武兮書劍名揚蘊儀度兮閨門譽長珠沉玉沒
兮人誰靡傷桂頰蘭凋兮共泣摧香垂修名兮允
謂不亾傳事盛兮多載彌光聽悲風兮松韻連崗
刻貞石兮永志阮堂

秦金石文字記此卽世所謂崔鶯鶯者也年七十
六有子六人與鄭合葬此銘得之魏縣土中足辨
會真記之誣而志墓
之功於是爲不細也

唐故尹府君朱氏夫人墓誌銘 并敘

曾缺祖從家狀官告墜失不敘府君諱澄其先望

在天水貫居秦州 今權居孟州卽爲河陽縣人
也公爲人端耿 開成四年告終於私第春秋六
十有七夫人朱氏卽世廣陵郡人也 會昌四年
十月十九日終於私室春秋六十有三男女七人
長子_因慶新婦王氏次子_因禮新婦戴氏次子_因
簡新婦賈氏次子_因雅新婦王氏小子_因殷未昏
長女十四孀夫張氏十五孀歸開氏 卜得會昌
四年十一月十八日葬於孟州河陽縣安樂鄉

案此與前張說誌皆有諱無字
此誌又列書子婦皆例之異者

唐貝州永濟縣故馬公郝氏二夫人墓誌銘 并敘

碑版廣例

卷九

廿

公諱恒父諱超其先扶風郡人也 因官徙居甘
陵郡乃祖乃父遂爲永濟縣人焉公以禮爲度以
德爲車衣著篇章飲食經籍 懷寶不仕韜道迷
邦於是通德互門仁者爲里嗚呼天不慙遺神莫
見祐元和七年七月廿一日寢疾終於沙邱方私
第享年卅 先夫人松蘿靡託葛藟無依 以開
成六年正月十三日與二夫人遷葬於故塋 子仲
子 缺二 盡 缺 以竭家資因爲遷祔

以自號冠於姓名之上例

瘞鶴銘雖不能確定其時代大要是唐以前刻所稱

真逸山樵真宰僊尉等斷然爲自號所從始元和中
元次山子友讓修浯谿記自署浯谿山客貞元中劉
宇撰書鹽池神碑陰自署五老山人垂拱中美原神
泉詩碑自署裕暘子又書雲陽主簿暘臺子徐彥伯
字光或祇署自號不題姓名或以自號冠其姓名之
上皆是唐例其他見於碑版如蘇元明之號中行子
元結之號浪士聳寔漫郎漫寔不可攷舉道號亦非
自宋人始也

以祖父官階冠於姓名之上例

天寶元年元元靈應頌分標朝散大夫守倉部郎中
碑版廣例

卷九

十三

上柱國戴璇撰敘朝散大夫守戶部郎中劉同昇撰
頌開府儀同三司尚書右僕射曾孫戴伋書石華鐫
華以伋稱曾孫爲璇也錢少詹事謂伋爲戴至德曾
孫唐制三品以上蔭曾孫五品以上蔭孫孫降子一
等曾孫降孫一等贈官降正官一等僕射秩從二品
開府儀同三司秩一品伋蓋承蔭而未得官者故以
曾孫係銜猶梁府君碑稱四品孫五品孫也此又任
子署名之一例

案大雲寺碑撰書人後列一行曰睿祖康皇帝孫
文林郎太原武盡禮勒上新書天授元年立武氏
七廟追尊周文王曰始祖文皇帝四代祖平王
少子武曰睿祖康皇帝凡武氏子孫皆同源於睿

祖康皇帝天后拜薛懷義為輔國大將軍令與浮屠造太雲經經中有女主之符敕天下各建大雲寺盡禮乃天后族屬故自敘如此

公主雖已出家仍書公主例

唐金僊長公主高宗天皇大帝之孫睿宗大聖皇帝之女太極元年與玉真公主皆度為女道士而徐嶠之撰其神道碑元宗御書仍標公主蓋已入道而猶得陪葬橋陵不以女道士目之也

案是碑題後文前直題中大夫大理卿徐嶠之撰乃人臣自撰其文而人主書之初非奉敕撰之也

親王公主不當更書某地人例

唐碑李氏多不書姓者國姓易知也李孝同碑曰公

碑版廣例 卷九

廿

諱孝同高祖太武皇帝之從子太宗文皇帝之從祖弟也此最莊重得體潛研堂跋亦謂親王公主天家肺腑其姓望世所共知可不更書而沈約撰安陸王碑任昉撰竟陵王行狀皆稱南蘭陵人唐汝南蘭陵諸公主碑皆書隴西狄道人殊未通乎尊王之義其論甚篤蓋唐人重門閥碑版所書某地人或其族望所出不必皆實隸郡貫相沿習擢遂有施之親懿者耳

貴官墓表亦祇稱碣例

爾朱遼墓碣標題曰唐故銀青光祿大夫檢校太子

賓客兼監察御史柱國河南爾朱府君墓碣其碣首
云府君其先河南郡人也其下云府君諱達字正道
不書姓蓋其姓已見於題卽不更見於文亦合爲章
法之例爾朱在當日勲階亦貴矣然不云墓表不曰
神道碑題之曰碣蓋降五品爲碣亦宋以後例耳貴
得同賤此其徵也

道士碣所始例

唐以後先生之稱歸於道流武后時有黠僊中嶽體
園先生大中大夫潘尊師碣文雍州司功王適撰敘
弟子中巖道士司馬承禎書此爲道士碣所始

碑版廣例

卷九

七

誌銘亦有御撰例

咸通八年魏馮熙十二代孫元德等重立昌黎馮王
新廟碑敘熙在北魏太武時尚博陵公主孝文卽位
前後取熙三女其二爲后一爲昭儀熙之歿也孝文
爲撰誌銘縗服親臨墓所其事出於亂世不爲典要
然自古人臣御撰誌銘惟見於此外皆賜碑也

始用堪輿家羅經山嚮例

用堪輿家羅經山嚮以箸葬地例始唐人大中十二
年侯官縣丞湯華墓誌歸葬於朐州鄞縣龍山鄉江
上里庚嚮之原大理司直郭思訓墓誌景雲二年遷

合於洛陽北部鄉之原陪葬先塋之壬地元次山唐
臺銘敘周行三四百步從未申至丑寅皆就地言之
漢末以干支紀天時猶不以志地勢也

碑題紀事例

唐一代有紀事卽在碑題中觀其題而其事可識者
前此所未有也今括錄以見大概

范陽郡憫忠寺御史大夫史思邈奉爲大唐光天
大聖文武孝感皇帝敬無垢淨光寶塔頌

大唐洛州濟源縣宗姓奉爲高宗天皇大帝於奉
先觀敬造太上老君石像碑

碑版廣例

卷九

共

大唐朝議大夫行聞喜縣令上柱國臨淄縣開國
男子君請移置唐興寺碑

皇帝降誕日爲國建無垢淨光塔銘

追樹十八代祖晉司空河東太守倚氏侯太原王

公神道碑

濟瀆廟北海壇二所新置祭器沉幣雙舫雜物之

銘并敘

開元天寶聖文神武皇帝夢烈祖元元皇帝靈應

頌

景教流行中國碑

大雲寺皇帝聖祚之碑

大唐眞空寺奉爲國及法界衆生敬修大佛頂陀羅尼石幢紀

唐大德寺造像并建彌勒閣碑銘

臨高寺重修葺碑

大唐洛州滎陽縣頭陀逸僧識法師上頌聖主中興得賢令盧公清德之文

大唐易州石亭府左果毅都尉薊縣田義起石浮屠頌

唐故將軍柱國史公石像銘

碑版廣例

卷九

七

大唐博陵郡北嶽恒山封安天王之銘

敕還少林寺神王師子記

以年月入標題例

開業寺碑頌後魏李喬捨宅爲寺及其歷世子孫修建功德其標題大書年月亦唐例所初見者

大唐開耀二年歲次壬午二月乙丑朔八日壬申

李公碑并敘

瑩記兆記之例

漢魏以來有墓碑有墓誌無瑩記之名唐初高士廉陪葬昭陵有瑩兆記瑩記立名自李陽冰始其文簡

質無銘辭爲後來墓記之所從出而書撰出於一家
不煩異姓又一例也

三墳記

先侍郎之子曰曜卿字華名世才也因樂易機

符朗徹既冠遭室不造諸季冲藐植之以德藝博

之以文行始調祕書正字授右衛騎曹轉新缺尉

豪猾未孚立信以示之禮浮窳未復本仁以示之

義領長安尉直京師浩穰缺賊曹籛劇有立斷焉

缺見焉左遷普安郡戶掾賦古樂府廿四章左史

章嗣良爲之敘文集十卷

碑版廣例

卷九

廿

缺卿字萬天骨琅琅德缺文蔚識度標邁弱冠以

明經觀國莅鹿邑虞鄉二尉魏守崔公沔洎相國

晉公缺甲科第之進等舉之嘗游嵩少夜聞山

鐘賦云缺也洪鑪沸鼎火半歿巨缺重林風少

止無閒缺未已詞人珍之轉金城尉曹無受謝

吏不敢缺卷行於世

缺卿字榮寬粟柔立於穆不瑕起家拜靈昌主簿

巳丑歲小冢宰李公彭年尚其文翰署朝邑主簿

時漆江決溢馮翊昏墊醜渠楫蓄股朶脈激下土

得訖上腴成賦人到於今賴之文集百一十二篇

於戲三英孝友曾閔儔也文學繼業璿碧產也純
固含章杞梓材也昊穹生德宜受封福僅逾強仕
以講陰堂未盈一紀三墳相比思其外職訊之序
占占者邵權曰霸陵故塋葬不違禁害於而家歲
攝提格乃貞陽卜而祔大墳三墳以東南爲伯仲
叔貶之若雁行終大厯建元之明年於斯刻石恐
夫溟海爲陸老沙防焉

季卿述 陽冰書 栗光刻

案此碑爲李曜卿兄弟三墓其最少弟季卿所述
而宗人陽冰爲之篆又後漢書周磐夢見先師東
里先生與講於陰堂之輿旣而長
歎其月無病忽終記蓋用此事也

碑版廣例

卷九

九

栖霞先塋記

粵烏虜昔倉龍大泉獻遭家不造先侍郎卽世建

塋霸陵遺令也先大夫徐公高缺備矣洎單闕歲

十有一月先夫人合祔天瑤改元我之伯也卒閒

五六年仲也卒不四三年叔也卒君子曰李氏子

天假其才不將其壽益謀及龜策謀及鬼神與方

士邵權徧得管郭之道暗曰霸岸鑿龕容土垆矣

于溫冥之禁非窳窳攸宜是用缺叶永地其原鳳

栖筮之遇損之解曰損孚解緩吉孰甚焉乃缺

郟城左缺二右惟茲食故卜滄水東樊水西亦惟

寬等故吏門生各自分立之碑而已

墓表出於瑩兆記例

陪葬昭陵百餘人各自立碑惟申文獻公高士廉一人稱瑩兆記攷房園齡碑有特旨許立墓碑語豈陪葬者必取旨方得立碑士廉當日未及取旨故不稱碑而稱記耶其文有敘無銘爲後來墓表有敘無銘例所自出墓表與神道碑異名同物故墓表之有銘者亦多要其本始則惟此小異而已

唐德政碑有官立私立之分例

唐武后朝禁有司不得輒立德政碑其有當立者皆碑版廣例

卷九

世

奏請下其事尚書考功議之今傳於世若李抱真碑撰書篆額皆題奉敕此由上請而官爲立之也龔邱令庾貴碑李陽冰自述縣人求紀是民所私立也蓋自反正後武后之禁弛故私碑流濫有如白樂天青石詩所譏余旣錄漢人遺愛去思之作并錄此以見源流遷變備體格焉

昭義軍節度支度營田兼澤潞磁邢洛等州觀察

處置等使光祿大夫檢校司空同中書門下平章

事兼潞州大都督府長史上柱國義陽郡王李公

德政碑銘 并敘

銀青光祿大夫守門下侍郎門下平章事上柱國隴西縣開國伯董晉奉敕撰

銀青光祿大夫守戶部尚書判度支及諸道鹽鐵轉運等副使上柱國扶風郡開國公班固奉

敕書

朝散大夫守

缺一字

府長史淮陽縣開國男韓秀

弼奉敕篆額

唐

缺元臣曰義陽郡王洵真字太元皇開府儀同

三司涼州都督河蘭鄯廓瓜沙甘肅九州大總管

申國公修仁之元孫開府儀同三司左武衛大將

碑版廣例

卷九

世三

軍永之曾孫贈兵部尚書懷恪之孫贈太子太保齊管之子蓄河嶽之秀業祖考之慶克生鴻才以佐元后弱冠爲從父兄故相國抱玉所重期以遠大薦於肅宗授汾州別駕拜殿中少監澤

州刺史公虔奉聖旨專精吏職軍給人集風

淳俗又遂遷懷州刺史未幾懷如澤焉天子

寵文翁之能旌龔遂之美乃授檢校祕書監

仍知潞州大都督府事建中元年特授節制并

廉察本道兼領潞州大都督府長史練勤王之師

修守土之備由是上澤得以下流下情得以上

達君臣無閒致於太和公之力也屬軍戎之後蟲
旱爲灾公請禱神祇精感而飛蝗越境誠懇而
霖雨應期稼穡獲全異於他部古之循吏何以加
焉公前後歷官以十八政再爲侍御史中丞尚書
常侍三領郡守一登亞相兩踐端揆封義陽郡王
食實封六百戶命爲承弼同平章事俾平水土兼
領司空非德及蒼缺忠貫白日何以臻此潞之
緇黃耆庶詣闕陳請願勒貞石帝嘉乃誠詔門下
侍郎平章事董晉撰文以昭其功銘曰

皇矣上帝降祚有唐蘊萃孕靈克生義陽明明天

碑版廣例

卷九

世三

子賢能是獎乃命義陽鎮於上缺烈烈義陽惟國

之楨

缺

若

缺

隱

如

長

城

用

極

於

正

性

根

於

忠

英

風外馳明謨內融王度克臻惠此罷人以德代刑

敬澆爲淳軍以威缺兌缺攝恢振皇綱輔弼天

業帝曰抱真允文允武俾登鼎鉉錫之茅土名高

方召道冠申甫刊石紀缺用駕終古

案新書傳抱真貞元初自京師還鎮會天下無事

乃好方士有孫季長爲治丹因讓司空還爲左僕

射餌丹二萬三千九而卒

此碑尚在潞鎮時所立也
唐龔邱縣令庾公德政頌
荀藐古之良宰也榆次碣之庾公今之賢百里也

龔邱頌之始無缺能缺紀議者謂庾公之政尤

矣公初告羣吏曰昔孝宣憂元元缺為經國致理

缺三長乃擇郎官御史之宰縣邑我自任城尉驟

居五百石非才何以當之折缺蘇疲人祇若明

命乃崇禮讓省刑罰紆力役闢土田宣茲缺儉

缺二潤作時雨和為春風於是齊魯丕變井閭咸

復三載考績一方歸最都缺御史清河張公曰

昌牧伯之賢也訓俗馭官勸直沮枉述職之地類

能缺之方諸爽氣日暮更清比諸松筠歲寒轉

茂題以上下之目出乎羣萃之表缺二千里異聲

碑版廣例 卷九

世

同歡曰以伯達之良牧賞次孫之茂宰宜矣公名

賈字缺明其先潁川人成周之時世為掌庾因以

命族公其胄焉公之考曰欽嗣為缺州別駕王父

曰元汪為潯陽令曾王父曰師則為蜀王文學楷

模繼代龜鱗接武大厯中邑考彭涵等三十五人

以公缺柔缺大咸願刻石褒美申於元戎元戎允

答縣人以陽冰與公周旋備詳德行缺之作頌多

媿能文辭曰

於穆庾公宰字之良化洽百里風洒一方邑老上

請願言頌德元戎嘉之金石乃刻

大歷五年九月三日建

此九字特大書在碑之第一行

案碑不列書撰人名而撰人名氏自見碑中他碑敘世系多自高曾順下此則自考上溯曾祖又一

也例

碑版中稱公稱君例

李勣裴光庭楊珣等碑御製御書其額題竝篇中皆稱公是以人主而稱臣下爲公也漢孔耽碑其子手自注石稱耽爲君顏君家廟碑魯公自撰并書額題竝篇中皆稱君是以人子而稱其父爲君也漢有故民吳公碑蘇氏謂尊之則曰公賢之則曰君亦是宋以後例前此未必皆然

碑版廣例

卷九

世

書景時猶曰吉時例

古人卒葬書曰不書時其志立碑歲月亦然唐故吏部常選廣宗郡潘府君墓誌銘後有天寶七載七月五日景時一行誌中已明書戊子歲實沉月五日癸酉殯於長安龍首鄉則此非卒時亦非葬時始是勒石歲月授堂跋以此誌戊字缺畫謂景時卽是丙時紀時者例皆從支此獨用干爲異余謂非也以景代丙雖由唐諱然此景字乃景運之景猶曰吉時與丙丁之丙避諱易之者不同景明也凡傳記景星景命景行景光景鑠等皆訓景爲明亦良辰令序之義大

秦寺僧景淨述景教流行中國碑釋景字之義有曰
景宿告祥又曰懸景日以破暗府又曰功用昭彰強
名景教又曰巨唐道光景風東扇又曰天安汎彩英
朗景門又曰各置景寺又曰家殷景福又曰白衣景
士今見其人其碑末曰大唐建中二年歲在作噩太
簇月七日大耀森文日建立此景時或同彼家所稱
大耀森文取意於照臨下土六合昭蘇未可知也况
景時二字又見北齊書南陽王綽傳彼在唐諱未出
以前又何爲而然邪

賜額及上額事皆起於僧道例

碑版廣例

卷九

世

義琬禪師誌載大使相郭公上額拜受永僊觀主田
尊師頌載元宗至道大聖大明孝皇帝賜額曰永僊
觀景教流行中國碑天題寺榜額戴龍書足知賜額
及貴官上額之事皆起於唐又皆僧道者流藉爲榮
寵焉爾

書再適有諱有不諱例

涼國長公主碑蘇頲撰鄔國長公主碑張說撰皆明
皇御書涼國始封僊源下嫁薛伯陽伯陽坐父稷誅
流嶺表公主改嫁溫曦頲撰其碑惟書故丞相虞公
太原溫彥博曾孫曦台癸門閣風流儒雅僉諧是圖

歷選伊尚不及伯陽是諱其先夫也其下子西華等
云云始溫氏之息非韓後矣鄆國先嫁薛徹徹歿公
主改嫁鄭孝義說撰其碑皆大書不諱始云求之令
族殯於薛氏又云朝制斷恩改降鄭氏又云有男子
四女子五均養七子庶蔭二宗汾陰之室忘亾滎陽
之黨相慶非惟不諱而書其先夫之事如詳焉宋賢
書范文正公母游定夫先生母皆從張說例也二公
主皆陪葬於睿宗頌與說二文俱工而頌撰涼國碑
中君子至止碩人其頌協時之吉備典之實雜佩明
璫錦衣褰裳熒熒煌煌有秀有芳居迴映以虹倚動
碑版廣例

卷九

世

羣超而翠翔向向用韻非獨古文用韻唐初駢儷之
作雖不能盡去六朝餘習猶欲力追淳古上從漢法
如此

敘世系婚配卒葬異文例

大中四年吏部尚書高元裕碑殘缺失撰人名氏而
敘次頗皆有義碑首諱字之下卽敘六代祖士廉下
乃敘其受姓之始源於太公望下又敘六代祖以上
諸世而後及於高曾以下其大書六代祖於前者士
廉受知太宗所以大本朝之殊遇也下書無疾暴蒙
於南陽殆非令終而事有難著故諱之也下書前妻

隴西李氏吉州刺史宣之女後娶京兆韋氏鄭國公
孝寬七代孫蓋古人書子婦不詳所出而於夫人則
未嘗不著也書歸葬以李夫人合窆從祔先府君兆
次又書一子璩李出則韋夫人無出而尚存可知也
不以無出而不書所以殊於妾媵者流存而見錄所
由與漢碑異例也

追加賜姓例

李光進光顏之父良臣世爲西北阿跌部歸唐後亦
仍氏阿跌迨其子光進光顏有功賜姓屬籍李宗閔
撰其墓碑書之曰李公是以賜姓追加之也猶房彥

碑版廣例

卷九

世

謙卒於隋以其子元齡贈官賜葬遂書唐官而并書
唐故耳宗閔文雅健令狐楚撰其子光進碑亦高房
有生氣拔奇於韓柳之外可見唐一代文境亦非韓
柳所能盡也

碑版文廣例卷九

碑版文廣例卷十

長洲王芑孫念豐輯

唐

僧用俗葬俗用僧塔例

北魏以來所謂塔銘塔頌塔贊塔記皆爲刊佛刊經或藏舍利而設非以葬僧也葬僧有塔銘塔有文皆起於唐如珪禪師塔記淨藏禪師身塔銘是也其後僧徒亦未能盡用彼法或隨俗爲墳因用墓碑如思恒律師墓誌道安禪師碑銘是也而士大夫之奉佛者或轉用彼法如王居士塹塔銘是也塹塔銘辭有碑版廣例

卷十

一

齊梁之舊書兼歐褚之風語簡韻長列而錄之亦銘文之一例也

大唐王居士塹塔之銘

上官靈芝製文

敬客書

居士諱公字孝寬太原晉陽人也英宗穎邁遠胄

隆周茂緒遐昌鬱冠後魏樂府歌其載德天下挹

其家聲具詳圖牒豈煩翮縷居士早標先覺本遺

名利遍覽典墳備窮義窟觀老莊如糟粕視孔墨

猶灰塵得給園之說聲求彼岸之路勵精七覺仰

十地而剋勤肝食一麻欣六年之顛顛方期拔除
煩惱永離蓋纏何悟積善始基處悲生滅以顯慶
元年十一月廿九日寢疾終于京第春秋七十有
三卽以三年十月十二日收骸起靈塔於終南山
梗梓谷風吟邃潤寶鐸和鳴雲散危峰金盤吐曜
道長運短迹往名留不刊介石孰播徽猷吁其嗟
焉乃爲銘曰
懿矣居士剛哉悟貞幽鑒彼岸妙道問津苦節無
撓貞心剋勤顧藐三有超修十輪俄隨怛化遽此
遷神歸然靈塔長欽後人

碑版廣例

卷十

二

案高宗萬年宮銘有風清邃澗之語疑此中風吟
邃澗句澗字亦當是澗字邃澗與危峯作對金盤
與寶鐸作對於文義爲順始書者偶然筆誤漢唐
諸碑訛文脫句皆就書丹刻之不復點易亦見古
人朴塞
之意也

李北海撰唐故逸人竇居士神道碑銘書逸人又書
居士碑首敘世系曰曾祖居士某祖居士某考居士
某於其人三代亦稱居士碑中有幽抱虛壑閑卧深
林黃卷晨開素琴夕引迹在人間志逸區外投緡清
流隱几磐石匪赤松不追匪黃庭不誦鶴矯神遷蟬
蛻形解雖人事似促而僊路實遐語然則王居士學
佛而竇居士學僊者也故雖以季子元禮爲內侍勳

至上柱國階至銀青光祿大夫皆略不書而書居士
然碑中仍稱神道夫人仍稱沛郡太夫人亦所以著
其爵秩之尊爾

碑側有記例

古碑多四面刻之故有碑陰之記又有碑側之記魯
公撰宋文貞公神道碑銘書其兩面一側而留其一
側記文貞逸事及文貞子衡陷蕃而歸文貞孫儼請
撰碑文并薛日嵩封演購石立碑之事於是去文貞
卒三十五年矣文旣追撰石亦追刊惟碑側記作於
刊石之年故補綴襟事皆漢例也唐一代碑版在韓
碑版廣例

卷十

三

柳未出前大抵猶承漢例以碑側長篇無過於此今
略錄其文焉

唐故太尉廣平文貞公宋公神道碑側記

顏真卿撰并書

初公任監察御史持服於沙河縣屬突厥寇趙定
州河朔兇懼邢州刺史黃文軌投艱於公公以父
母之邦金革無避及賊至城下公爲曉陳禍福其
徒有素聞公威名者乃相率而去之開元末安西
都護趙含章冒於貨賄多以金帛賂朝廷之士九
品以上悉皆有名其後節度范陽事方發覺有司

具以上聞元宗切責名品將加黜削公一無所受
乃進諫焉元宗納之遂御華萼樓一切釋放舉朝
皆謝公衣冠儼然獨立不拜翌日入奏元宗謂公
曰古人以清白貽子孫乃卿一人而已公曰含章
之賄偶不至臣門非不受也元宗深嘉歎之前碑
缺焉故略述於此公第三子渾之爲中丞也方欲
陳乞御製碑頌未果而中受譴謫旋羯胡作亂事
竟不成真卿時忝監察殿中爲中丞屬吏故公孫
儼泣請真卿論撰之昭義軍節度觀察使尚書左

僕射兼御史大夫平陽郡王薛公日嵩以文武忠

碑版廣例

卷十

四

義之姿爲國保障上慕公之德業歎尚無窮次嘉
儼之懇誠崇豎莫致乃命屯田郎中權知邢州刺
史封演購他山之石曳以百牛僦刻字之工成乎
半歲磨礪旣畢建立斯崇遠近嗟稱古今雄觀雖
大賢爲德樹善庸限於存亾而小子何知附驥託
迹於階序真卿刺湖州之日因成缺文請儼刻其
側而志之未及彫鐫而公第八子衡因謫居沙洲
參佐戎幕河隴失守介於吐蕃以功累拜工部郎
中兼侍御史河西節度行軍司馬與節度周鼎保
守燉煌僅十餘歲遂有中丞常侍之拜恩命未達

吐蕃圍城兵盡矢窮爲賊所陷吐蕃素聞太尉名德曰唐天子我之舅也衡之父舊賢相也落魄於此其可留乎遂贈以馳馬送還大厯十一年十一月以二百騎盡室護歸士君子偉之古來所無也上欲別加超獎且命待制於側門十三年春三月吏部尚書顏真卿記

封禪碑例

古稱封泰山者七十二家勒石千八百餘處今傳於世自秦刻石以外無聞焉司馬班范之紀兩漢封禪其文辭不概見唐高宗元宗皆嘗東封要惟元宗開碑版廣例

卷十

五

元十四年爲盛其文御製御書摩崖高二丈九尺字徑五寸題額字一尺九寸漢以來碑碣之雄未有逮者以明皇之才而燕許修其辭韓史潤其筆欲不工而不可得矣一時廷臣莫非鉅手各有撰造事辭相稱亦文字中一大昌會也唐一代文前有九成宮後有中興頌又後平淮西而柳雅與中興頌皆非奉敕立極於古今官文章無過開元故今錄之前此太宗晉祠銘第覺辭勝後此宋真宗王旦東封之事抑未矣

唐元宗明皇帝封泰山玉牒文

有唐嗣天子臣某敢昭吉於昊天上帝天啓李氏
運興上德高祖太宗受命立極高宗升中六合殷
盛中宗紹復繼體不定上帝眷祐錫臣忠武底綏
內難推戴聖父恭承大寶十有三年欽若天意四
海宴然封祀岱嶽謝成於天子孫百祿蒼生受福
紀泰山銘

朕宅帝位十有四載顧惟不德慳於至道任夫難
任安夫難安茲朕未知獲戾於上下心之浩蕩若
涉於大川賴上帝垂休先后儲慶宰衡庶尹文修
皇極四海會同五典敷暢歲云再熟人用大和百

碑版廣例

卷十

六

辟僉謀唱予封禪謂孝莫大於嚴父禮莫尊於告
天天符既至人望其積固請不已固辭不獲予與
夫二三臣稽虞典繹漢制張皇六師震疊九寓旌
旅有烈士馬無譁肅肅邕邕翼翼溶溶以至於岱
宗順也爾雅云泰山爲東嶽周官曰兗州之鎮山
實惟天帝之孫羣靈之府其方處萬物之始故稱
岱焉其位居五嶽之伯故稱宗焉曰昔者受命易
姓於是乎啓天地薦成功敘圖籙紀氏族朕承先
王茲率厥典實欲報天之恩命爲蒼生之祈福
豈敢高視萬古自比九皇哉故設壇場於山下受

羣方之助祭躬封燎於山上冀一獻之通神斯亦
因高崇天就廣增地之義也乃仲冬庚寅有事東
嶽類於昊天上帝配我高祖在天之神罔不畢降
粵翊日禪於社首侑我聖考祀於皇祇在地之神
罔不咸舉暨千辰覲羣后上公進曰天子膺天符
納介福羣臣拜于稽首稱千萬歲慶答歡同陳誠
以德大渾叶度彛倫攸敘三事百揆時乃之功一
二兄弟篤以孝友錫類萬國時惟休哉我儒制禮
我史作樂天地擾順時惟休哉蠻夷戎狄重譯來
貢累聖之化朕何慕焉五靈百寶日來月集會昌

碑版廣例

卷十

七

之運朕何感焉凡今而後儆乃在位一王度齊衆
法權舊章補缺政存簡易去煩苛思立人極乃見
天則於戲天生蒸人惟后時又能以美利利天下
事天剛矣坤厚載物惟后時相能以厚生生萬人
事地訥矣天地剛訥鬼神著矣惟我藝祖文考精
爽在天其曰懿予幼孫克享上帝時若馨香其丕
乃曰會我之文武曾孫其誕錫新命纘我舊業永
保天祿子孫其承之予小子敢對揚上帝之休命
則亦與百執事尚綏兆人將多於前功而忘彼後
患一夫不獲萬方其臯予一心有終上天其知我

朕惟寶行三德曰慈儉謙慈者覆無疆之言儉者崇將來之訓自滿者人損自謙者天益苟如是則軌迹易循基構易守磨石壁刻金記後之人聽辭而見心觀末而知本銘曰

惟天生人立君以理惟君受命奉爲天子代去不留人來無已德涼者滅道高斯起赫赫高祖明明太宗爰革隋政奄有萬邦罄天張宇盡地開封武稱有截文表時邕高宗稽古德施周溥茫茫九夷削平一鼓禮備封禪功齊舜禹巖巖岱宗衍我元神中宗紹運舊邦惟新睿宗繼明天下歸仁恭已

碑版廣例

卷十

八

南面網緼化醇告成之禮留諸後人緬予小子重基五聖匪功伐高匪德矜盛欽若祀典不承永命至誠動天福我萬姓古封泰山七十二君或禪社首或禪云亭其迹不見其名可聞祇適文祖光照舊勲方士虛誕儒書齷齪佚后求僊誣神檢玉秦灾風雨漢汙編錄德未合天或承之辱道在觀政名非從欲銘心絕巖播告羣嶽

張說封祀壇頌蘇頌朝覲頌皆見於唐文粹辭多不錄

頌德銘功碑例

頌德銘功碑版之用所自起唐一代或踵前而作或

初古所無兩漢以來於斯爲盛要取其事辭相稱可垂後武者例之亦聊舉一二爾

大唐中興頌

元結

天寶十四年安祿山陷洛陽明年陷長安天子幸蜀太子卽位於靈武明年皇帝移軍鳳翔其年復兩京上皇還京師於戲前代帝王有盛德大業者必見於歌頌若今歌頌大業刻之金石非老於文學其誰宜爲頌曰

噫嘻前朝孽臣姦驕爲昏爲妖邊將騁兵毒亂國經羣生失禦大駕南巡百僚竄身奉賊稱臣天將

碑版廣例

卷十

九

昌唐繫晚我皇匹馬北方獨立一呼千麾萬旗戎卒前驅我師其東儲皇撫戎蕩攘羣凶復缺指期曾不踰時有國無之事有至難宗廟再安二聖重

歡地闢天開蠲除妖灾瑞慶大來凶徒逆儔涵濡天休歿生堪羞功勞位尊忠烈名存澤流子孫盛德之興山高日升萬福是膺能令大君聲容沄沄不在斯文湘江東西中直浯谿石崖天齊可磨可鐫刊此頌焉何千萬年

三受降城碑銘并敘

呂溫

夏后氏遏洪水驅龍蛇能禦大蓄以活黔首周文

王城朔方逐獫狁能捍大患以安中區若非高岸峻防重門擊柝雖有盛德曷觀成功然則持璿璣而弛張萬象昊穹之妙用扼勝勢以擒縱八極王者之密圖道雖無外權則有備變化消息存乎其人三受降城皇唐之勝勢者也昔秦不量力北築長城右扼臨洮左馳碣石生人盡去不足乘障兩漢之後頽爲荒邱退居河滸歷代莫進矯亡秦之弊則可矣盡中國之利則未然唐興因循未暇經啓有拂雲祠者在河之北地形雄坦控扼樞會虜伏其下以窺域中禱神觀兵然後入寇甲不及擐

碑版廣例

卷十

十一

突如其來鯨一躍而吞舟虎數步而擇肉塞州落而邊岷懼河水堅而羽檄交爰自受命至於中興國無禦歲景龍二年默啜強暴瀆鄰搆怨掃境西代漢南空虛朔方大總管韓國公張仁愿躡機而謀請築三城奪據其地跨大河以北嚮制胡馬之南牧中宗詔許橫議不撓於是留及瓜之戍斬奸命之卒六旬雷動三城嶽立以拂雲祠爲中城東西相去各四百里過朝那而北關席候迭望幾二千所損費億計減兵萬人分形以據同力而守東極於海西窳於天納陰山於寸眸拳大漠於一掌

驚塵飛而烽火耀孤雁起而刁斗鳴涉河而南門
用宴閑韓公猶以爲未也方將建大旆提金鼓馳
神竿鞠虎旅看旄頭明滅與太白進退小則貢琛
賫受厥角定保塞一隅之安大則倒狼居竭瀚海
空苦塞萬里之野大略方運元勳不集天其未使
我唐無北顧之憂乎厥後賢愚迭任工拙異勢剛
者黷武柔者敗律城隳險固寇得凌軼或驅馬飲
河而去或控弭靡壘而旋吾知韓公不瞑目於地
下矣今天子誕敷文德茂育羣生戢兵和親七狄
右衽然而軍志有受降如敵大易有安不忘危崇
墉言言其可弛柝亦宜鎮以元老授之廟勝俾述
舊職而恢遺功外勤撫綏內謹經略使其來不敢
仰視去不敢反顧永讐猛氣無生禍心聳威馴恩
禽息荒外安固萬代術何加焉敢勒石城隅庶復
隍而光烈不昧銘曰

韓侯受命志在朔易北方之強制以全策亘漢橫

塞揭茲雄壁如三鬪龍躍出大澤竝分稔帶各閉

風雷俯視陰山仰看昭回一夫登陴萬里洞開日

晏秋盡纖塵不來時惟韓侯方運神妙觀釁則動

乃誅乃弔廓乎窮荒盡日所照天乎未贊不策清

廟我聖耀德罷扁北門優而柔之用息元元曷若
完守推亾固存于襄于夷永裕後昆

平淮碑

韓雲卿

惟唐上元辛丑歲叛臣劉展竊地弄兵悖撓天常
肆虐黎人淮泗而南施於闐越人殘令絕職貢不
修先皇帝命我特進試鴻臚卿兼御史中丞田神
功統盧龍勁卒控殛引鏑萬有餘騎涉淮浮江梟
懸魁逆布宣德澤返旆河南吳楚之人父子相歡
戚屬相賀土壤耕闢年穀豐登舳艫若飛歲月相
屬朝廷甄收顯寵薦及出領方面入秉端揆錫圭

碑版廣例

卷十

十一

分社有土爲王牧守遠近耆耄農桑工賈飲惠懷
德皆願銘石江許播垂休烈其辭曰

昔在上元中夏猶虞姦凶矯攘鯨毒楚吳帝命信
都偏師萬人鐵騎騰凌風行雲奔頓旗偃節敦諭
威德凶慝不俊搖蠱恃毒桓桓信都奮髯提戈援
桴軍門氣凌山河地祇號風江靈鼓波上隕髦頭
下除巴蛇通地之經導天之和人胥已安積十餘
年田野豐穰轉漕如川伊昔有周召虎方叔降及
嬴秦翦起繼躡履險成功孰與爲足天子是咨南
人是懷享國莫都銘功海門陵谷可遷碩德常存

平淮西碑

段文昌

夫五兵之設本以助文德而成教化故聖人不專任之其有桀鷲暴邪干紀作孽道德不服則兵以威之文告不諭則兵以靜之在禁暴除害而已自黃帝堯舜不能無誅至湯武受命武功寔盛其本之以仁義行之以弔伐惟帝與王率由茲道於戲勦業之君勞而後定守文之主安而忘戰故三代之衰功在五伯未有中葉之後再安生靈前古所無歸於聖代我唐運之興也高祖太宗以仁義之兵除暴隋之亂戎功祖武百代丕承元宗嘗亦內

碑版廣例

卷十

十一

翦姦邪外清夷狄所以繼文之代協帝之明既而禍起於微亂生於理由是髓髀之衆結固於兩河斤斧不可懸厯於五紀肅宗親翦大憝且務生育德宗順宗觀於天象察於人事以理運未致沴氣猶凝運啓昇平以俟後聖惟我后握樞出震端扆向明考上元之心思祖宗之意埽滌區宇光啓帝國不以萬乘爲尊四海爲富遵大禹櫛風之志有光武乙夜之勤以爲景擒七國而漢氏安成翦三監而周化洽焉有患難未去而德教可興日者惠琳恃近狄之固劉闢憑坤維之險李錡保長江之

衝從史資太行之阻四凶相扇繼爲亂常三數年
閒盡膏鈇鎖太尉茂昭以中山之地盡室來朝司
空宏正以全魏之邦舉宗向闕義風所激莫不歸
心況彭城從折簡之召橫海展執圭之覲向談虞
虢之存亡議輔車之形勢莫不刳心斷臂繼踵爲
忠旣而麟見於巴賓之閒河清於廊衛之際固同
本之貺昭聖祚之符廓清寰海兆於此矣而長淮
右地連山四起控扼吳楚密邇輶轅有上帝濯龍
之池同冀方多馬之國戈鋌雪照駟駿雲屯二姓
三凶憑阻作孽歲在甲午吳少誠積禍而斃餘殃

碑版廣例

卷十

十四

聚於逆嗣氛祲淮瀆我后方弔人省寃愆灾除穢
猶命使者持節往申寵賻以柔服之義示含宏之
仁元濟劫衆拒境滔天肆逆剽葉縣燒舞陽侵襄
城伊洛之閒騷然震恐乃詢廷議咸願假以墨經
授以兵符天子淵默以思靈馳以斷獨發宸慮不
詢衆謀漢宣從屯田之議晉武決平吳之計至聖
不惑羣疑自消於是會鳧藻之師得鷹揚之帥以
中軍帥李光顏往者平朔邊靜庸蜀雙矛電激孤
劒飈馳亦由馮異之總軍鋒子顏之將突騎才氣
雄武可掃欃槍總魏博河陽鄆陽凡三軍自臨頽

而前以河陽軍帥烏重光當從史內誅邪謀外阻
兵勢精誠奮發獨應王師故得虜魏豹於軍中縛
呂布於麾下識慮中正可革臬音益以汝海之地
總朔方義成陝虢劍南西川鳳翔延州禦慶凡七
軍由襄陽而進宣武帥韓宏請以子公武領精卒
一萬三千時集洄曲爨書作帥鍼爲戎右充國討
虜印統支軍是能從帥之命成父之志又以壽春
守李文通夙精戎韜累習軍旅明於守備可保金
湯總宣武淮南宣歙浙西徐泗凡五軍阨固始之
險以鄂岳都團練使李道古以先曹王臯有任城

碑版廣例

卷十

五

之武昔征凶渠嘗取安陸授以戎柄嗣其家聲乘
五關之隘以唐鄧隨帥李愬溫敏能斷靜深有謀
昔趙孟慕成季之勲復能霸晉亞夫紹絳侯之武
亦克擒吳想其英徽必有以嗣山南東道荆南凡
兩軍自文成而東乃命御史中丞裴度布挾纊之
恩奉如絲之命以諭羣帥以撫輿師且以古之會
兵必謀元帥令歸於一勢不欲分命宣武軍帥韓
宏爲諸道行營都統假陸遜之鉞拜韓信之壇指
蹤畫奇正之機發號申嚴凝之令然後有司馬之
法節制之師而寒暑再懼賊曹未下又命內掌樞

密之臣梁守謙肅將天威盡護諸將懸白日於千里推赤心於萬人由是甘嚮奮升城之勇君文勵擊堰之志焚上蔡以翦其翼拔郢城以扼其吭以軒后攻蚩尤之亂殷宗伐鬼方之臯周公誅淮夷之叛雖以聖討逆皆三年後定百辟之議且謂久勞將決其機以安海內復命丞相裴度持淮蔡之節撫將帥之臣分鄧禹之麾旆盛寶憲之幕府四牡業業于蕃于宣先是光顏重[允]公武戎旅同心壘垣齊列長蛇之勢首尾相從發胡騎之雄紛紜縱擊逐餘孽如鳥雀獵殘寇似狐狸于矛杖行次

碑版廣例

卷十

六

於洄曲丞相之來也羣帥之志氣逾厲統制之號今益明勢如雷霆功在漏刻賊乃悉其精騎以備洄曲之師唐隋帥李愬新總傷痍之軍稍厲奔此之氣城孤援絕地逼勢危而能養貔虎之威未嘗矍視屈鷲鳥之勢不使怒形是以收文成柵而降吳秀琳下興橋而擒李祐果敢多略衆以留之或謂蓄患不利吾軍愬誠明在躬秉信不撓爰命釋縛授之親兵佑感概之心出於萬死縱橫之計果效六奇粵十月旣聖陰凝雪飛天地盡閉愬乃遣其將史嚮仇良輔留鎮文城備其侵軼命李祐

領突騎三千以爲鄉導自領中軍三千與監軍使
李誠義繼進又遣其將田進誠領馬步三千以殿
其後郊雲晦冥寒可墮指一夕卷旆凌晨破關鋪
敦淮瀆仍執醜虜雖魏軍得田疇爲導潛出盧龍
鄧艾得田章旣登長驅絲竹用奇制勝與古爲儔
四紀逋誅一朝蕩定攄宗廟之宿憤致黎庶之乂
安周漢以還莫斯爲盛帝命策勲進宏爲侍中光
顏重允竝爲司空愬爲左僕射帥山南東道公武
加散騎常侍節制廊坊丹延道古進御史大夫文
通加散騎常侍王師獲金爵之賞環境蒙優復之

碑版廣例

卷十

七

恩掩骼埋胔除瑕宥臯躋羣生於壽域還比戶於
可封東西南北無思不服丞相旋請來朝後加金
紫光祿大夫封晉國公乃眷淮瀆蒸人生殖俾擇
循吏撫其疾傷以宣慰副使刑部侍郎馬總領淮
蔡之任天子議功雲臺追美將帥俾刻金石以揚
休勲而百辟僉謀羣帥克讓推義士之志敢會天
功徵賢臣之言實在君德於是搢紳之士暨侯服
之臣上獻鴻名式昭徽策然後光輝千古聲聞百
蠻詔命掌文之臣文昌勅銘淮浦庶乎閱周雅者
美宣王之中興觀劍銘者戒蜀川之恃險銘曰

天有肅殺萬物以成雷風爲令霜霰爲刑君有武節四海以禦陳之原野阻以甲兵在昔聖土格禦邦國武以禁暴刑以助德牧除害馬農去蝨賊苟非戎功孰靜羣慝明明我后神算精微九重獨運千里不違宵衣旰食再安中寓始翦朔漠旋梟蜀虜丹徒鏖凜白門縛布服茲肆臯豈勞一旋淮夷怙亂四十餘年長蛇未翦寰宇騷然逮於孽童逆志滔天懷柔匪及告諭罔悛帝念生人乃由薄伐飛將鷹揚前鋒電發齋壇命信靈旗指越我武維揚妖氛未滅集於洄曲決戰摧凶豹略臨晉維留

碑版廣例

卷十

六

沓中桓桓攘帥應變無窮浮嬰暗度東馬潛攻合以長圍絕其飛走布德滅妖升城獲醜裔不改肆農安其畝洄曲殘兵投戈束手帝嘉羣帥賞不踰時畫社啓封圭組陸離泊於蠻貊服我英威刻之金石作戒淮夷

墓碑前有敘後有系辭例

李義山追作白樂天碑以敘事起而以一文曰一系曰繼之猶漢例也卒葬不日文以追作故也碑後附宏農夫人楊氏辭以紀其子積資刊石之難則所刻見義山古文既不多見簡勁有拔於唐雜家之外故

錄其文

唐刑部尚書致仕贈尚書右僕射太原白公墓碑

銘 并敘

李商隱

公以致仕刑部尚書年七十五會昌六年八月薨
東都贈右僕射十一月遂葬龍門子景受大中三
年自潁陽尉典治集賢御書侍太夫人宏農郡君
楊氏來京師胖胖兢兢奉公之遺畏不克既乃件
右功世以命其客取文刻碑文曰

公字樂天諱居易前進士避祖諱選書判拔萃注
祕省校書元年對憲宗詔策語切不得爲諫官補

碑版廣例

卷十

九

盤屋尉明年試進士取故蕭遂州澣爲第一事畢
帖集賢校理月中詔由右銀臺門入翰林院試文
五篇明日以所試制加段佑兵部尚書領涇州遂
爲學士右拾遺滿將擬官請掾京兆以助供養授
戶曹時上愛兵襄陽荊州入疏獻物在約束外公
密詆二帥且曰非善良後雖與宰相不厭入聲禍其
後禮官竟以多殺不辜謚于頓爲厲李師古襲父
事逆務作項領以謾儕曹上錢六百萬贖文貞故
第以與魏氏公又言文貞第正堂用太宗殿材魏
氏歲臘鋪席祭其先人今雖窮後當有賢卽朝廷

覆一瓦魏氏有分彼安肯入賊所贖第耶上由是
賜錢直券以居其孫在職三年每譙見多前笏留
上輦是否意詔湔剔扶摩望及少年見天下無一
事五年會憂掩坎廬墓七年以左贊善大夫著吉
武相遇盜殊絕賊棄刃天街日比午長安中盡知
公以次紙爲疏言元衡灰狀不得報卽貶江州移
忠州刺史穆宗用爲司門員外四月知制誥加秩
主客眞守中書舍人敘緋受旨起田孝公代恒陽
孝公行贈錢五百萬拒不內燕趙相殺不已公又
上疏列言河朔畔岸復不報又貶杭州旣至築隄

碑版廣例

卷十

三

扞江分殺水孔道用肥見田發故鄴侯泌五井淳
儲甘清以變飲食循錢塘上下民迎禱祠神伴侶
歌舞徙右庶子出蘇州授祕書監換服色遷刑部
侍郎乞官分司得太子賓客除河南尹復爲舊官
進階開國九年除同州不上改太子少傅申百日
假又二歲得所夢官白氏由楚入秦秦自不直杜
郵事封子仲太原以有其後祖某鞏縣令考季庚
襄州別駕贈太保一女妻譚氏始公生七月能展
書指之無二字橫縱不誤旣長與弟行簡俱有名
故李刑部建廣左丞敬休友最善居家以戶小飲

薄酒朔望晦輒不肉食攜鄧同韋楚白服游人閒
姓名過海流入雞林日南有文字圖爲中書舍人
二日如建中詔書上鄭公覃自代後爲相稱質直
文宗時文貞公果有孫起使下數歲至諫議大夫
賢可任爲今上御史中丞他日景受嘗跪曰大人
居翰林六同列五且爲相獨白氏亾有公笑曰汝
少以待其曾祖弟今右僕射平章事敏中果相天
子復憲宗所欲得開七關絕句城守四川以集巨代
仲冬南至備宰相儀物擎跪齊栗給事寡嫠永禦
里中有兄弟冢指嚮健慕以信公知人集七十五
碑版廣例

卷十

世

卷元相爲敘系曰

公之世先用談說聞肅代代優布蹤河南陰德未
校公有弟昆本跋不搖乃果敷舒匪酪匪臙噫其
醇腴於鄉洎邦取用不窮天子見之層陞玉堂徵
徵其中上汰唐禹帝爲輦留續緒襞纒歲終當遷
戶曹是取有白其華疇不痕縉上聲用從棄遣至道
天子疇誰與伍率中道上納筆懾麾綽三郡理旣
去刑部條東其居大尹河南翦其暴逋君有三輔
臣有田畝臣衰君強謝不堪守翊翊申申君子之
文不僭不怒惟君子武君子旣貞兩有其矩孰永

厥家曾祖之弟坤柄與繩以就大計匪哲則知亦有教詔益褒其收摠莠而導刻詩於碑以報百世公老於東遂葬其地

傷子辭

宏農楊氏

予有令子儉衣削食以紀先功志刊貞石彼蒼不遺俾善莫隆今子建立痛寃無窮

新墓碑銘例

李杜旣軼於唐世科名之外而官皆拾遺當元宗朝李之恩遇遠勝於杜天寶亂離杜猶得以麻屨進見而李不霑一命以卒古之傷心人無如命何然杜之

碑版廣例

卷十

世

拾遺旣得而旋失之李之拾遺命下於身後故同一拾遺也世以稱杜不以稱李惟范傳正李公新墓碑銘書其歿後之官曰左拾遺書其生前之遇曰翰林學士兩朝所命竝舉之矣傳正以本朝人改葬本朝前輩而碑之其墓乃刊二石一寘泉扃一表通路則是以前幽銘陽碣合而爲一亦剗例也錄其大略以示後有同其事而發峴首漢川之悲者

唐左拾遺翰林學士李公新墓碑銘

并敘

范傳正

公名白字太白其先隴西成紀人絕嗣之家難求

譜牒公之孫女授於箱篋中得公之亾子伯禽手
疏十數行紙壞字缺不能詳備約而計之涼武昭
王九代孫隋末多難一房被竄於碎葉流離散落
隱易姓名故自國朝以來編於屬籍神龍初潛還
廣漢因僑爲郡人父客以逋其邑遂以客爲名高
臥雲林不求祿仕公之生也先府君指天枝以復
姓先夫人夢長庚而告祥名之與字咸所取象受
五行之剛氣叔夜心高挺三蜀之雄才相如文逸
公以爲千鈞之弩一發不中則當摧撞折牙而
永逸機用安能效碌碌者蘇而復上哉脫屣軒冕

碑版廣例

卷十

三

釋羈繯鏹因肆情性大放宇宙閒飲酒非嗜其酣
樂取其昏以富作詩非事乎文律取其吟以適好
神僊非慕其輕舉將不可求之事求之欲耗壯心
遣餘年也 俄屬戎馬生郊遠身海上往來於斗
牛之分優游歿身偶乘扁舟一日千里或遇勝境
終年不移時長江遠山一泉一石無往而不自得
也晚歲渡牛渚磯至姑熟悅謝家青山有終焉之
志盤桓利居竟卒於此其生也聖朝之高士其往
也當途之旅人代宗之初授羅俊逸拜公左拾遺
制下於彤庭禮降於元壤生不及祿歿而稱官嗚

呼命歟傳正生唐代甲子相懸常於先大夫文字
中見與公有潯陽夜宴詩則知與公有通家之舊
蚤於人間得公遺篇逸句吟咏在口無何叨蒙恩
獎廉問宣池按圖得公之墳墓在當塗邑因令禁
樵采備洒掃訪公之子孫欲申慰薦凡三四年乃
獲孫女二人一爲陳雲之室一爲劉勸之妻皆編
戶岷也因召至郡庭與語相見衣服邨落形容朴
野而進退閑都應對詳諦且祖德如在儒風宛然
問其所以則曰父伯禽以貞元八年不祿而卒有
兄一人出游一十二年不知所在父存無官父歿

碑版廣例

卷十

廿

爲民有兄不相保爲天下之窮人無桑以自蠶非
不知機杼無田以自力非不知稼穡况婦人不任
布帛糲食何所仰給儷於農夫救疾而已久不敢
聞於縣官懼辱祖考鄉閭逼迫忍恥來告言訖淚
下余亦對之泣然因云先祖志在青山遺言宅兆
頃屬多故殯於龍山東麓地近而非本意墳高三
尺日益摧圯力且不及知如之何聞之憫然將遂
其請因當塗令諸葛縱會計在州得諭其事縱亦
好事者學爲歌詩樂聞其語便道還縣躬相地形
卜新宅於青山之陽以元和十二年正月二十二

日遷神於此遂公之志也西去舊墳六里南抵驛路三百步北倚謝公山卽青山也天寶十二載敕改名焉因告二女將改適於士族皆曰夫妻之道命也亦分也在孤窮旣失身於下俚仗威力乃求援於他門生縱偷安歿何面目見大父於地下欲敗其類所不忍聞余亦嘉之不奪其志復并稅免徭役而已今士大夫之葬必誌於墓有勲庸道德之家兼樹碑於道余才術貧虛不能兩致今作新墓碑輒刊二石一寘於泉扃一表於通路亦峴首漢川之義也庶芳聲之不泯焉文集二十卷或得

碑版廣例

卷五

廿五

於時之文士或得之於宗族編輯斷簡以行於代
銘曰

嵩嶽降神是生輔臣蓬萊遺真是爲逸人晉有七賢唐稱八僊應彼星象惟公一焉晦以麴蘖暢於文篇萬象奔禿乎筆端萬慮泯滅乎罇前臥必酒甕行惟酒船席地幕天但貴乎適其所適不知夫所以然而然至今尚疑其醉在千日禦審乎壽終百年謝公山兮李公墓異代詩流同此路舊墳卑庫風雨侵新宅爽塏松柏林故鄉萬里且無嗣二女從民永於此猗與琢石爲二碑一藏幽隧一臨

岐岸深谷高變化時一存一毀名不虧

立石追表因加銘陰例

房相有德於岐文士李華爲作房太尉德銘但有韻語別無敘言其時亂不克立後刺史王涯始爲追立柳宗元爲作房太尉德銘之陰兼頌涯立石之美猶之一人爲敘一人爲銘之例矣

諱字皆祇一見例

權文公作鹽鐵轉運使李公誌標其名於首行其下書字不復如他碑之書諱某字某亦文法之變而加精者也

碑版廣例

卷十

共

陪葬碑例

唐太宗慕漢氏之將相陪陵貞觀十一年詔所司自今以後功臣密戚德業尤著如有夢亾宜賜塋地一所及祭器又貞觀二十年詔曰周室姬公陪於畢陌漢庭蕭相附彼高園寵賜墳塋聞諸上代從窆陵邑信有舊章宜令所司於昭陵左右廂封境取地仍卽標識疆域擬爲葬所以賜功臣其有父祖陪陵子孫欲來從葬者亦宜聽允陪葬之制以文武分爲左右列墳高四丈以下三丈以上子孫從葬者亦如之諸陵皆置留守禁人無得葬埋古墳則不毀之唐一代

昭陵獻陵皆有陪葬而昭陵爲盛自諸王妃嬪宰相丞郎功臣大將軍而下凡百有六十六人其碑之傳於世者二十一其文之可見者二十五其文或御製或奉敕撰文或子弟自求他人爲之無定例而必詔許立碑然後碑焉其文中紀恩數喪葬所須竝官給有曰給東園祕器曰賻布絹若干段米粟若干石曰班劔若干人羽葆鼓吹送至墓所往還曰遣使副二人監護曰賜謚備禮告柩皆其常也於高士廉則曰親御城樓臨送於李勣則曰駕至橫門投書永訣於許洛仁則曰度三人出家以資冥福於阿史那忠則

碑版廣例

卷十

七

曰以常所服甲隨瘞皆特典也至於作冢象陰山積石山以昭其功則惟李勣李靖有之此例之尤變者也

公主碑其駙馬有書有不書例

作公主碑有以再適而兩駙馬之名皆沒不見者張說之撰鄔國公主是也有以再適而不書先夫獨箸後夫者蘇頲之撰涼國公主是也有因公主而兼頌駙馬者李義府之撰蘭陵公主是也蘭陵所適使持節慶州諸軍事扶風竇懷慈旣敘其才又述其世此正例也金僊玉真諸公主以入道汝南公主以在室

故其碑皆無出降之文耳

奉敕撰文自有與時變通例

前此御製李勣諸臣及張說等奉敕撰臣下諸碑推大其臣之德善功烈不遺餘力至裴度撰西平王碑則不能極意鋪張議者皆以晉公之文爲不稱謂西平諸子與韓柳同時李愿又接游於昌黎而不解求文爲惜夫晟之卒也帝旣紀其勲力太子書石立之東渭橋矣越十餘年晟少子聽又以墓碑請於朝乃以其文命度非聽所求作者也奉敕之文自有體製西平業已功高震主度又身兼將相自不敢更爲揚

碑版廣例

卷十

廿

詔昌黎之淮西碑子瞻之溫公碑極情盡致卒來忌口而迄不得有其辭君子上下其間觀於褒譏挹損之文辭又慨然增衰世之思也晉公文亦自寬博簡重雖頗異於韓柳而亦不下於韓柳夫言豈一端而已今爲錄其文至於贈太師謚忠武諸犖犖大者篇中漏略何知非別見渭橋御製之碑也哉

唐故太尉兼中書令西平郡王贈太師李公神道

碑銘

并敘

特進守司空兼門下侍郎同中書門下平章事充

集賢殿大學士上柱國晉國公臣裴度奉敕撰

朝散大夫守尚書庫部郎中翰林侍書學士上柱
國賜紫金魚袋臣柳公權奉敕書并篆額

惟天錫成命於我唐保茲國祚生此人傑則西平
王李公其是乎不然何覆暴如風振槁葉戴君若
鼇冠靈山橫流之中一匡而定公諱晟字良器其
先隴西人後徙京兆曾祖嵩皇珉州刺史祖思恭
皇洮州刺史贈幽州大都督考欽皇左金吾衛大
將軍隴右節度經略副使贈太子太保代有名迹
雄於西土公幼好學學不爲人及讀呂張孫吳之
書慨然有經邦濟物之志未弱冠游秦涼閒元侯

碑版廣例

卷十

七

宿將見者咸器異之乾元初嘗客武都值酋豪以
缺守遘亂殺掠平人公與所從十數騎馳而射之
殪其爲魁者餘黨遂遁寇所虜獲積如邱山公一
無所取惟椎牛醞酒享士而去邦人感服具狀以
聞特拜左清道率飾以金紫將朝京師自獻方略
屬裔夷紛擾有土急賢河隴將帥相繼表用歷二
府右職所至常以才謀爲其委重累遷至光祿太
常卿階爵在第一品涇原四鎮北庭節度都知兵
馬使四面都游奕使懸識虜態周知地形應變不
窮有奪有待驥驟庭而莫展雲出岫而斯飛代宗

徵之以左金吾衛將軍爲神策軍兵馬使屬羌蠻
犯蜀朝廷濟師命公督禁旅絕棧道而往救焉公
銜枚過險出賊不意連下堅壁遂誅首惡還授檢
校太子賓客且復舊職建中二年田悅以魏叛德
宗極意致討悉起徂征以公爲神策先鋒都知兵
馬使加御史中丞與河東河南等道諸軍合擊公
濟河而行能以衆整及破洹水陣解臨洺圍轢魏
屬城抵燕通邑其摧鋒劘銳皆先羣帥而置力焉
遙拜左散騎常侍兼御史大夫厥功未成聞賊泚
肆逆皇居失守西向慟哭載馳載驅行及代北授

碑版廣例

卷十

三

檢校工部尚書充神策行營節度公提孤軍募散
卒拊循訓勵以達行在值懷光中叛大駕再遷加
檢校右僕射餘如故尋轉左僕射同平章事兼京
兆尹神策軍京畿鄜坊節度觀察等使管內及商
華等州副元帥公固守渭城決平秦壘調食制用
先發我私捐甘攻苦皆自我始每一言一誓聲淚
俱發勇夫義士感而使之蔑不濟矣時自雍而東
延於汝洛震於河汴所在征鎮亂略相從公介巨
盜之間使聲援斷絕立成師之法致號令肅嚴鬼
捕十旬指揮一舉乘墉壑而通軌道磔梟鏡以清

宮禁俾九市三條無輟肆之驚無秋毫之犯羽書
速告鑿輅爰歸廓氛祲爲祥光攄憂憤爲喜氣詩
曰允矣君子展也大成斯之謂與考古視今論功
稱忠者多矣若至危而安至難而易卓犖跨邁如
公莫儔拜司徒兼中書令俄以凶孽甫禦邊防猶
警岐下任重乃以本官兼鳳翔尹鳳翔隴右節度
觀察等使及四鎮北庭涇原等州副元帥改封西
平郡王加食邑實封至一千五百戶公名懾戎王
政和藩部始至而生植少安而訓齊逮四載賦輿
十倍其初會課入輔拜太尉中樞如故人或謂公

碑版廣例

卷十

世一

勲望已高寵渥已極宜從容頤養稍稍遜避公曰
不然人臣外則盡力內則盡心若止儉榮孰爲且
哲故每承帷幄之間則言咈無隱理奪不回大指
以東夏可平西陲可復或已行而事終不顯或未
用而身遽不遺以貞元九年八月四日薨於位春
秋六十七德宗撫几哭於別次自都邑達關畿無
士庶無老幼皆發哀相弔則曩時戰兵安人之德
可謂浹於元元之骨髓矣冊贈太師賻贈加等以
其年十二月十六日葬於高陵縣奉正原鄭國夫
人杜氏祔焉自捐寢至安宅皆所司辦護中貴反

覆萬情所奉如不及焉嗚呼以公之靖難扶傾不言所利雖存沒極位始終殊禮而天意若曰其福享未至故迤涎於後有子曰愿故檢校司空河中節度等使贈司徒五列雄鎮三爲上公曰聰故光祿寺主簿曰總故太子中允贈兵部郎中曰孫左神武大將軍兼御史大夫曰憑故右武衛大將軍兼御史中丞贈洪州都督曰恕故光祿卿贈右散騎常侍曰憲檢校左散騎常侍領南節度觀察等使兼御史大夫進因貴胄達以善政曰愬故檢校

左僕射同平章事贈太尉克廣前修仍執醜虜曰

碑版廣例

卷十

七

懿故渭南尉曰聽檢校司徒義成軍節度使統戎按俗是以似之曰碁右羽林將軍曰愬嵐州刺史竝地勢吏用兼而有焉粵大和元年秋七月聽拜疏上言以公之徽烈則御製碑文於渭川矣公之風度則詔命圖形於雲臺矣惟大其邱隴鬱彼松檟望有祁山之象拜無峴首之碑將刊貞石式表幽隧乃命臣度稱代言詩其詞曰

建中季年大盜忽焉皇輿避狄狩於梁川顧謂太師汝才汝略將威致討必彌寇虐太師泣奉捐軀誓衆度其成城可以利用赫以鋪敦傳於牆垣手

搏足踣如衝如援一鼓而破一麾而奔掃清宮闈
刷蕩妖昏我師蒞止我令行矣都人不知已事方
喜飛章告慶飭駕言旋鴻烈耀古謹聲動天車服
之錫河山之誓九命而俯一心若屬俾侯於岐阜
安邊陲藩政旣成袞職攸宜嶽降帝賚矢言詭辭
我后嘉猷我躬何爲道直氣和勞謙終吉福履所
綏未享萬一上天不惠厚宥遄歸垂裕流光用延
恩暉翼子肥家將壇台席繼立奇功代傳休績聽
與伯仲永懷高蹤請於朝廷表是邱封帝曰孝哉
胡可不從宣我祖之不業繁爾父之嘉甯乃詔作

碑版廣例

卷十

銘以觀億齡

大和三年歲次己酉四月庚戌朔六日乙卯建

案抱經盧氏云魏明帝與北魏孝文帝年號俱是
太和唐文宗年號大和是大小之大今人一例作

太和
誤也

碑版廣例跋

昔嘗聞諸先大父曰自來作碑版文字如高山出雲
網縕升中隨風變幻無一而非雲也何例之有然而
昧者指烟痕水氣以實之則慎矣惕甫先生之爲碑
版文廣例也亦猶爲不知雲者示之準也先生旣歿
此書藏之篋笥洎道光丙申先生哲嗣又樗姑丈命
文錄爲卷帙求以行世而先生族弟亮生夫子爲謀
諸同族得授梓人以文世誼姻親命爲書文校字始
於庚夏成於辛冬殺青旣竟敢以聞諸祖庭者附識
簡末辛丑冬至前三日後學江元文拜跋

碑版廣例

跋

